



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/45/2026

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

7 ապրիլի 2026թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող), Արամայիս Փաշինյանի, Արմեն Մարուխյանի և Եփրեմ Կարապետյանի (այսուհետ՝ Հանձնաժողով), 2026 թվականի ապրիլի 7-ին քննության առնելով «ՀԱՅՔ» լիբերալ կուսակցության (այսուհետ՝ Կուսակցություն) նախագահ՝ Հայկ Մաղաքեղյանի կողմից Վարչական իրավախախտումների վերաբերյալ ՀՀ օրենսգրքի (այսուհետ՝ Օրենսգիրք) 189.13-րդ հոդվածի 2-րդ մասով նախատեսված վարչական իրավախախտման վերաբերյալ ՎԻՎ/45/2026 գործը՝

Պ Ա Ր Ձ Ե Ց

I. Վարչական իրավախախտման վերաբերյալ գործի վարույթի նախապատմությունը

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի (այսուհետ՝ Օրենք) 23-րդ հոդվածի 1-ին մասի 9-րդ կետով սահմանված գործառույթի շրջանակում, «Կուսակցությունների մասին» սահմանադրական օրենքի (այսուհետ՝ Սահմանադրական օրենք) 22-րդ հոդվածի 1-ին մասի 2-րդ կետով, ինչպես նաև 27-րդ հոդվածի 2-րդ, 3-րդ մասերով սահմանված պահանջների պահպանվածության ստուգման արդյունքում հայտնաբերել է, որ Կուսակցության ֆինանսական միջոցների աղբյուրների և ծախսերի, ինչպես նաև գույքի մասին 2024 թվականի տարեկան հաշվետվությունն (այսուհետ՝ նաև Տարեկան հաշվետվություն) օրենքով սահմանված կարգով և ժամկետում Հանձնաժողով չի ներկայացվել: Նշվածի հիման վրա Օրենսգրքի 189.13-րդ հոդվածի 1-ին մասի հիմքով, 2025 թվականի

հոկտեմբերի 22-ին Կուսակցության պաշտոնատար անձի՝ Կուսակցության նախագահ Հայկ Մաղաքեյանի նկատմամբ կիրառվել է վարչական տույժ:

1.2 Կիրառված վարչական տույժի վերաբերյալ Հայկ Մաղաքեյանը պատշաճ ծանուցվել է Օրենսգրքի 283-րդ հոդվածով սահմանված կարգով: Մասնավորապես, Վերջինիս նկատմամբ կայացված ՎԻՎ/312/2025 որոշումը (այսուհետ՝ նաև Որոշում) 2025 թվականի նոյեմբերի 11-ի թիվ 01/4355-2025 գրությամբ ուղարկվել է Հայկ Մաղաքեյանին: Հաշվի առնելով այն հանգամանքը, որ Որոշումն ուղարկելու օրվանից հետո՝ երկշաբաթյա ժամկետում, Հանձնաժողովը չի ստացել հետադարձ ծանուցումը (ծանուցման մասին անդորրագիրը), Հանձնաժողովը նշված Որոշումը 2025 թվականի նոյեմբերի 26-ին տեղադրել է Հայաստանի Հանրապետության հրապարակային ծանուցումների պաշտոնական ինտերնետային (www.azdarar.am) կայքում, որից հետո 5-րդ օրը՝ 2025 թվականի դեկտեմբերի 1-ին, Որոշումը օրենքի ուժով համարվել է Հայկ Մաղաքեյանին հանձնված (ստացված), իսկ 2026 թվականի փետրվարի 2-ին՝ դարձել է անբողոքարկելի վարչական ակտ:

1.3 Վարչական տույժի միջոցներ կիրառելուց հետո մեկ ամսվա ընթացքում Հայկ Մաղաքեյանը Տարեկան հաշվետվությունն օրենքով սահմանված կարգով և ժամկետում Հանձնաժողով չի ներկայացրել, այսինքն՝ վերջինիս կողմից իրավախախտումը կատարվել է կրկին:

1.4 Նշված իրավախախտման հայտնաբերմամբ պայմանավորված՝ Հանձնաժողովը 2026 թվականի մարտի 11-ի թիվ 01/643-2026 ծանուցումն ուղարկել է Հայկ Մաղաքեյանին: Հաշվի առնելով այն հանգամանքը, որ ծանուցումն ուղարկելու օրվանից հետո՝ երկշաբաթյա ժամկետում, Հանձնաժողովը չի ստացել հետադարձ ծանուցումը (ծանուցման մասին անդորրագիրը), Հանձնաժողովը, առաջնորդվելով «Վարչարարության հիմունքների և վարչական վարույթի մասին» Հայաստանի Հանրապետության օրենքի 29.1-ին հոդվածի կարգավորումներով՝ ծանուցումը ուղարկել է Կապան համայնքի ղեկավարին և միաժամանակ 2026 թվականի մարտի 26-ին տեղադրել է Հայաստանի Հանրապետության հրապարակային ծանուցումների պաշտոնական ինտերնետային կայքում (www.azdarar.am), որից հետո, հինգերորդ օրը՝ 2026 թվականի մարտի 31-ին, նշված ծանուցումը համարվել է հանձնված (ստացված):

1.5 Ծանուցման միջոցով Հայկ Մաղաքեյանը տեղեկացվել է, որ ծանուցումը ստանալուց հետո երրորդ աշխատանքային օրը՝ ժամը 11:00-ին անհրաժեշտ է ներկայանալ Հանձնաժողով՝ իր ներկայությամբ վարչական իրավախախտման վերաբերյալ արձանագրություն կազմելու նպատակով, իսկ հինգերորդ աշխատանքային օրը՝ ժամը 14:00-ին, վերոնշյալ առերևույթ իրավախախտման հիմքով կազմված արձանագրության և վերաբերելի նյութերի հիման վրա իրականացվելիք գործի քննությանը մասնակցելու նպատակով:

1.6 2026 թվականի ապրիլի 3-ին պատշաճ ծանուցված Կուսակցության նախագահ Հայկ Մաղաքեյանի բացակայությամբ կազմվել է թիվ 58/26 ՎԻՎ արձանագրությունը՝ Օրենսգրքի 189.13-րդ հոդվածի 2-րդ մասով նախատեսված իրավախախտման հատկանիշներով:

1.7 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Հայկ Մաղաքեյանի բացակայությամբ 2026 թվականի ապրիլի 7-ին՝ ժամը 14:00-ին, տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

Սույն վարույթի շրջանակներում վարույթի մասնակցի կողմից դիրքորոշում և պարզաբանումներ չեն ներկայացվել:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/45/2026 վարչական վարույթում առկա նյութերը, կատարել հանգամանքների քննություն, որի արդյունքում հաստատված է համարում.

3.1 Հանձնաժողովի կողմից 2025 թվականի հոկտեմբերի 22-ին ընդունվել է Վարչական տույժ կիրառելու մասին թիվ ՎԻՎ/312/2025 որոշումը՝ Կուսակցության նախագահ Հայկ Մաղաքեյանի նկատմամբ, որի մասին վերջինս պատշաճ ծանուցվել է (ծանուցված է համարվել) 2025 թվականի դեկտեմբերի 1-ին:

3.2 Կուսակցության նախագահ Հայկ Մաղաքեյանը Հանձնաժողովի կողմից Օրենսգրքի 189.13-րդ հոդվածի 1-ին մասի հիման վրա վարչական տույժ կիրառելուց հետո մեկ ամսվա ընթացքում կատարել է նույն խախտումը՝ Տարեկան հաշվետվությունն օրենքով սահմանված կարգով և ժամկետում չի ներկայացրել Հանձնաժողով

3.3 Արդարադատության նախարարության իրավաբանական անձանց պետական ռեգիստրի գործակալության էլեկտրոնային շտեմարանի տվյալների համաձայն՝ Հայկ

Մաղաքեյանը 2021 թվականի մայիսի 21-ից հանդիսանում է Կուսակցության գործադիր մարմնի ղեկավարը՝ նախագահը, ինչով պայմանավորված՝ հանդիսանում է Տարեկան հաշվետվությունը Հանձնաժողով ներկայացնելու պարտականություն կրող պաշտոնատար անձ:

3.4 Հայկ Մաղաքեյանի կողմից Կուսակցության ստացած և ծախսած միջոցների մասին 2021, 2022, 2023, 2024 և 2025 թվականների տարեկան հաշվետվությունները չեն ներկայացվել Հանձնաժողով:

3.5 Հայկ Մաղաքեյանը Օրենսգրքի 189.13-րդ հոդվածի 1-ին մասով նախատեսված իրավախախտումը կատարելու համար նախկինում պատասխանատվության է ենթարկվել 2024 թվականի հունվարի 24-ի ՎԻՎ/120/2023-24 և ՎԻՎ/121/2023-24, 2024 թվականի հոկտեմբերի 28-ի ՎԻՎ/320/2024, 2025 թվականի հոկտեմբերի 22-ի ՎԻՎ/312/2025 և 2026 թվականի մարտի 30-ի ՎԻՎ/44/2026 որոշումներով, իսկ Օրենսգրքի 189.13-րդ հոդվածի 2-րդ մասով նախատեսված իրավախախտումը կատարելու համար նախկինում պատասխանատվության է ենթարկվել Հանձնաժողովի 2025 թվականի հունվարի 31-ի ՎԻՎ/04/2025 որոշմամբ:

3.6 Մինչև վարչական իրավախախտման վերաբերյալ գործի քննության օրը Կուսակցության կողմից Տարեկան հաշվետվությունը Հանձնաժողով չի ներկայացվել:

IV. Որոշումն ընդունելու իրավական հիմքերը և հիմնավորումները

4.1 Սահմանադրական օրենքի՝ մինչև 2025 թվականի մարտի 31-ը գործող խմբագրության 22-րդ հոդվածի 1-ին մասի 2-րդ կետի համաձայն՝ Կուսակցությունը պարտավոր է յուրաքանչյուր տարի Հայաստանի Հանրապետության հրապարակային ծանուցումների պաշտոնական ինտերնետային կայքում՝ <http://www.azdarar.am>, հրապարակել ֆինանսական միջոցների աղբյուրների և ծախսերի, ինչպես նաև գույքի վերաբերյալ հաշվետվությունը:

4.2 Սահմանադրական օրենքի՝ մինչև 2025 թվականի մարտի 31-ը գործող խմբագրության 27-րդ հոդվածի 2-րդ մասի համաձայն՝ Կուսակցությունը պարտավոր է յուրաքանչյուր տարի՝ հաշվետու տարվան հաջորդող մայիսի 31-ից ոչ ուշ, Հայաստանի Հանրապետության հրապարակային ծանուցումների պաշտոնական ինտերնետային կայքում հրապարակել հաշվետու տարվա ընթացքում կուսակցության ֆինանսական միջոցների աղբյուրների և ծախսերի, ինչպես նաև գույքի մասին հաշվետվությունն, իսկ սույն օրենքով նախատեսված դեպքերում՝ նաև դրա վերաբերյալ աուդիտորական եզրակացությունը:

4.3 Սահմանադրական օրենքի՝ մինչև 2025 թվականի մարտի 31-ը գործող խմբագրության 27-րդ հոդվածի 3-րդ մասի համաձայն՝ Կուսակցությունն իր հաշվետվությունը Հայաստանի Հանրապետության հրապարակային ծանուցումների պաշտոնական ինտերնետային կայքում հրապարակելուց հետո՝ եռօրյա ժամկետում, պարտավոր է հաշվետվությունը և դրա հրապարակման փաստը վկայող ապացույցը ներկայացնել Կոռուպցիայի կանխարգելման հանձնաժողով:

4.4 Օրենքի 24-րդ հոդվածի 1-ին մասի 28-րդ կետի համաձայն՝ Հանձնաժողովը քննում և լուծում է կուսակցությունների ֆինանսական գործունեությանը և կուսակցությունների տարեկան հաշվետվություններին առնչվող խախտումների վերաբերյալ գործերը:

4.5 Օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.6 Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են պետության անվտանգության ապահովման, կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ: Սույն օրենսգրքի իմաստով՝ կուսակցության պաշտոնատար անձ է համարվում կուսակցության կանոնադրության կամ այլ փաստաթղթերի հիմքով՝ սույն օրենսգրքով պատասխանատվություն առաջացնող գործողությունների (անգործության) համար պատասխանատու կուսակցության ղեկավար մարմնի անդամը կամ կուսակցության՝ կազմակերպական-տնօրինչական, վարչատնտեսական գործառույթներ իրականացնող պատասխանատու անդամը կամ աշխատողը:

4.7 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.8 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.9 Օրենսգրքի 244.17-րդ հոդվածի համաձայն՝ Օրենսգրքի 189.13-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.10 Օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.11 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին:

4.12 Օրենսգրքի 189.13-րդ հոդվածի 1-ին մասի համաձայն՝ հաշվետու տարվա ընթացքում կուսակցության ստացած և ծախսած միջոցների մասին հաշվետվությունը օրենքով սահմանված կարգով և ժամկետում լիազոր մարմին չներկայացնելը կամ դա օրենքով սահմանված կարգով և ժամկետում չիրապարակելը առաջացնում է տուգանքի նշանակում կուսակցության պաշտոնատար անձանց նկատմամբ՝ սահմանված նվազագույն աշխատավարձի քառասնապատիկից մինչև հիսնապատիկի չափով:

4.13 Նույն հոդվածի 2-րդ մասի համաձայն՝ **նույն խախտումը, որը կատարվել է կրկին վարչական տույժի միջոցներ կիրառելուց հետո՝ մեկ ամսվա ընթացքում առաջացնում է**

տուգանքի նշանակում՝ սահմանված նվազագույն աշխատավարձի չորսհարյուրիսնապատիկից մինչև հինգհարյուրապատիկի չափով:

4.14 Սահմանադրական օրենքի 32-րդ հոդվածի 1-ին մասի 1-ին կետի համաձայն՝ Կուսակցության գործունեությունը կարող է կասեցվել, եթե կուսակցությունը իր գործունեության ընթացքում թույլ է տվել օրենքի կոպիտ խախտում:

4.15 Նույն հոդվածի 2-րդ մասի 1-ին կետի համաձայն՝ սույն հոդվածի 1-ին մասի իմաստով՝ օրենքի կոպիտ խախտում են համարվում կուսակցության կողմից օրենքով չթույլատրված կամ օրենքով սահմանված չափը գերազանցող նվիրատվությունները օրենքով սահմանված ժամկետում պետական բյուջե կամ նվիրատուին փոխանցելու կամ **կուսակցության տարեկան հաշվետվությունն օրենքով սահմանված ժամկետում և կարգով հրապարակելու կամ պետական լիազոր մարմին ներկայացնելու կամ օրենքով սահմանված՝ տարեկան հաշվետվության ստուգման համար անհրաժեշտ փաստաթղթերը Կոռուպցիայի կանխարգելման հանձնաժողովին տրամադրելու օրենքով սահմանված կարգը դիտավորությամբ խախտելը և Հայաստանի Հանրապետության օրենսդրությամբ նախատեսված կարգով պատասխանատվության ենթարկվելուց և Կոռուպցիայի կանխարգելման հանձնաժողովի կողմից կուսակցության գործունեությունը կասեցնելու հնարավորության վերաբերյալ գրավոր նախազգուշացվելուց հետո՝ երեսնօրյա ժամկետում, խախտումը չվերացնելը:**

4.16 Նույն հոդվածի 5-րդ մասի համաձայն՝ վարչական պատասխանատվության ենթարկվելուց հետո՝ երեսնօրյա ժամկետում, խախտումը չվերացնելու դեպքում Կոռուպցիայի կանխարգելման հանձնաժողովը այդ մասին անհապաղ տեղեկացնում է Հայաստանի Հանրապետության Ազգային ժողովին և Հայաստանի Հանրապետության կառավարությանը:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենսգրքի 189.13-րդ հոդվածի 2-րդ մասով նախատեսված դրույթը նպատակ է հետապնդում ապահովել հաշվետու տարվա ընթացքում Կուսակցության ստացած և ծախսած միջոցների մասին հանրային հաշվետվողականությունը, կոռուպցիոն ռիսկերից զերծ գործունեությունը:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյո՞ք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս չի պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Անդրադառնալով օրենսդրի կողմից նախանշված՝ Կուսակցության ֆինանսական հաշվետվողականության ապահովման, ինչպես նաև կոռուպցիոն ռիսկերից զերծ գործունեության ապահովման նպատակին՝ Հանձնաժողովն արձանագրում է, որ սույն դեպքում հաստատված փաստ է այն, որ ինչպես օրենսդրությամբ սահմանված ժամկետներում, այնպես էլ մինչև վարչական իրավախախտման վերաբերյալ գործի քննության ավարտը Կուսակցության կողմից Տարեկան հաշվետվությունն օրենքով սահմանված կարգով Հանձնաժողով չի ներկայացվել, ուստի չի ապահովվել Կուսակցության ֆինանսական գործունեության թափանցիկության ու հաշվետվողականության օրենսդրի նպատակը:

Միաժամանակ, նշվածով պայմանավորված՝ չի ապահովվել նաև օրենսդրի կողմից նախանշված՝ Կուսակցության կողմից կոռուպցիոն ռիսկերից զերծ գործունեության վերահսկողության նպատակը, քանի որ, ըստ էության, Կուսակցության կողմից Տարեկան հաշվետվությունը չներկայացնելու պայմաններում անհնար է դառնում Կուսակցության ֆինանսական գործունեության նկատմամբ վերահսկողության ապահովումը:

Հաշվի առնելով այն, որ Հայկ Մաղաքեյանը Որոշման մասին 2025 թվականի դեկտեմբերի 1-ին պատշաճ ծանուցվելուց հետո՝ մեկ ամսվա ընթացքում, Հաշվետվությունը Հանձնաժողով կրկին չի ներկայացրել, Հանձնաժողովը հաստատված է համարում այն հանգամանքը, որ առկա է Օրենսգրքի 189.13-րդ հոդվածի 2-րդ մասով նախատեսված վարչական իրավախախտում:

Ամփոփելով ամբողջ վերոնշյալը՝ Հանձնաժողովն արձանագրում է, որ «ՀԱՅՔ» լիբերալ կուսակցության նախագահ Հայկ Մաղաքեյանի կողմից թույլ է տրվել Օրենսգրքի 189.13-րդ

հողվածի 2-րդ մասով սահմանված խախտում, այն է՝ Հանձնաժողովի կողմից Օրենսգրքի 189.13-րդ հոդվածի 1-ին մասի հիմքով վարչական տույժ կիրառելուց հետո՝ մեկ ամսվա ընթացքում, կրկին կատարել է նույն խախտումը՝ Տարեկան հաշվետվությունն օրենքով սահմանված կարգով և ժամկետում չի ներկայացրել Հանձնաժողով:

Հանձնաժողովը Հայկ Մաղաքեյանի վարքագիծը գնահատելիս հաշվի է առել նաև այն հանգամանքը, որ Հայկ Մաղաքեյանի կողմից Կուսակցության ստացած և ծախսած միջոցների մասին 2021, 2022, 2023, 2024 և 2025 թվականների տարեկան հաշվետվությունները չեն ներկայացվել Հանձնաժողով:

Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ:

Արդարադատության նախարարության իրավաբանական անձանց պետական ռեգիստրի գործակալության էլեկտրոնային շտեմարանի տվյալների համաձայն՝ Հայկ Մաղաքեյանը 2021 թվականի մայիսի 21-ից հանդիսանում է Կուսակցության գործադիր մարմնի ղեկավարը՝ նախագահը, ինչով պայմանավորված՝ հանդիսանում է Տարեկան հաշվետվությունը Հանձնաժողով ներկայացնելու պարտականություն կրող պաշտոնատար անձ:

Հաշվի առնելով վերոնշյալը՝ Հայկ Մաղաքեյանը՝ որպես Օրենսգրքի 14-րդ հոդվածով նախատեսված կուսակցության պաշտոնատար անձ, ենթակա է պատասխանատվության Օրենսգրքի 189.13-րդ հոդվածի 2-րդ մասով սահմանված արարքի համար:

Հաշվի առնելով, որ Օրենսգրքի 189.13-րդ հոդվածի 2-րդ մասով սահմանված արարքի համար նախատեսված է վարչական պատասխանատվության ոչ հստակ սահմանաչափ (տուգանքի նշանակում՝ սահմանված նվազագույն աշխատավարձի չորսհարյուրհիսնապատիկից մինչև հինգհարյուրապատիկի չափով), Հանձնաժողովն արձանագրում է, որ Օրենսգրքի 189.13-րդ հոդվածի 2-րդ մասով վարչական տույժ կիրառելիս

պետք է հաշվի առնել ինչպես խախտման (արարքի) բնույթը, այնպես էլ պատասխանատվությունը ծանրացնող կամ մեղմացնող հանգամանքները:

Հանձնաժողովն արձանագրում է, որ սույն գործով վարչական վարույթի մասնակցի գործողություններում առկա չէ Օրենսգրքի 33-րդ հոդվածով սահմանված վարչական իրավախախտման համար պատասխանատվությունը մեղմացնող, ինչպես նաև Օրենսգրքի 34-րդ հոդվածով սահմանված վարչական իրավախախտման համար պատասխանատվությունը ծանրացնող հանգամանք:

Հիմք ընդունելով ամբողջ վերոգրյալը և ղեկավարվելով Օրենքի 24-րդ հոդվածի 1-ին մասի 28-րդ կետով, 26-րդ հոդվածով, Օրենսգրքի 189.13-րդ հոդվածի 2-ին մասով՝ Հանձնաժողովը.

Ո Ր Ո Շ Ե Ց

1. Հանձնաժողովի կողմից 2025 թվականի հոկտեմբերի 22-ին ՎԻՎ/312/2025 որոշմամբ վարչական տույժի միջոցներ կիրառելուց հետո՝ մեկ ամսվա ընթացքում նույն խախտումը կրկին կատարելու հիմքով «ՀԱՅՔ» լիբերալ կուսակցության նախագահ Հայկ Մաղաքեյանի նկատմամբ կիրառել վարչական տույժ սահմանված նվազագույն աշխատավարձի չորսհարյուրհիսնապատիկի՝ **450,000 (չորս հարյուր հիսուն հազար) ՀՀ դրամի չափով:**

2. Տուգանքը պետք է վճարվի գանձապետական **900005001335** «Իրավախախտումների համար կիրառվող վարչական տուգանքներ և պատժամիջոցներ» **հաշվեհամարին՝** վճարման անդորրագրի «նպատակ» դաշտում պարտադիր նշելով սույն որոշման համարը:

3. Սույն որոշումն ուժի մեջ է մտնում Հայկ Մաղաքեյանին այն սահմանված կարգով հանձնելուն (հանձնված համարվելուն) հաջորդող օրվանից:

4. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՅԱՆ